

Na osnovu čl. 14. i 45. stav 2. Zakona o Vijeću ministara Bosne i Hercegovine i ministarstvima Bosne i Hercegovine ("Službeni glasnik BiH", broj 11/2000), Vijeće ministara Bosne i Hercegovine na sjednici održanoj 5. oktobra 2000. godine, donijelo je

## **ODLUKU**

### **O OSNIVANJU KANCELARIJE ZA VETERINARSTVO BOSNE I HERCEGOVINE**

**( "Službeni glasnik BiH", broj 31 od 18. 12. 2000. godine )**

#### **I**

Osniva se Kancelarija za veterinarstvo Bosne i Hercegovine (u daljem tekstu: Kancelarija), utvrđuje nadležnost, način rukovođenja, ostvarivanje saradnje i druga pitanja od značaja za rad Kancelarije.

#### **II**

Kancelarija ima svojstvo pravnog lica sa svim pravima i odgovornostima iz svoje nadležnosti.

#### **III**

Sjedište Kancelarije je u Sarajevu, u zgradi institucija Bosne i Hercegovine.

#### **IV**

Kancelarijom rukovodi direktor.

Direktor Kancelarije ima dva zamjenika.

Direktora i zamjenika direktora imenuje i razrješava Vijeće ministara na period od tri godine.

Direktor i dva zamjenika se na svojim funkcijama rotiraju svake godine.

Direktor i dva zamjenika direktora ne mogu biti iz istog konstitutivnog naroda.

Za direktora i zamjenika direktora može se imenovati osoba koja ispunjava slijedeće uslove:

- da ima visoku stručnu spremu veterinarskog smjera;
- da ima visoko izražene organizacijske sposobnosti;
- da se posebno ističe u dosadašnjem radu.

#### **V**

Unutrašnja organizacija i sistematizacija radnih mjesta, kao i način rada Kancelarije utvrđuje se Pravilnikom o unutrašnjoj organizaciji Kancelarije, koji donosi direktor i zamjenici direktora Kancelarije uz prethodnu saglasnost Vijeća ministara Bosne i Hercegovine (u daljem tekstu: Vijeće ministara).

#### **VI**

Svoja ovlaštenja direktor i njegovi zamjenici vrše konsenzusom, na osnovu Statuta i drugih pozitivnih propisa.

Direktor i njegovi zamjenici za svoj rad odgovorni su Vijeću ministara.

## VII

Kancelarija ima Statut i opće akte koji su njime predviđeni.

Statut Kancelarije donosi direktor i zamjenici direktora Kancelarije uz prethodno pribavljenu saglasnost Vijeća ministara.

## VIII

Direktor Kancelarije dužan je u roku od 30 dana od dana stupanja na snagu ove odluke izvršiti slijedeće:

- - registrovati osnivanje Kancelarije;
- - donijeti Pravilnik o unutrašnjoj organizaciji i sistematizaciji radnih mjesta;
- - predložiti Vijeću ministara na usvajanje: plan rada, finansijski plan, plan nabavke sredstava i opreme za rad Kancelarije;
- - otvoriti žiro-račun Kancelarije;
- - obaviti i druge organizacijske i stručne poslove potrebne za rad Kancelarije.

## IX

U okviru svoje nadležnosti Kancelarija obavlja, posebno slijedeće poslove:

- predlaže propise i koordiniranje jedinstvenih mjera, metoda i postupaka kontrole zaraznih i parazitskih bolesti životinja s lista A i B Međunarodnog zoosanitarnog kodeksa O.I.E.;
- predlaže propise veterinarskih uslova za međunarodni promet (izvoz iz Bosne i Hercegovine i uvoz u Bosnu i Hercegovinu) životinja, sirovina, otpadaka i proizvoda životinjskog porijekla;
- predlaže propise uslova za registraciju objekata za klanje životinja i sprovođenje jedinstvenog postupka registracije objekata za proizvodnju, preradu, obradu, doradu ili čuvanje proizvoda i sirovina životinjskog porijekla namjenjenih izvozu, odnosno uvozu;
- predlaže propise jedinstvenog programa monitoringa i kontrole biorezidua u životinjama, te proizvodima i sirovinama životinjskog porijekla;
- koordinira rad granične veterinarske inspekcije i predlaže propise jedinstvene dokumentacije za uvoz, odnosno izvoz životinja, sirovina, otpadaka i proizvoda životinjskog porijekla i ustrojavanje jedinstvenog informacijskog sistema granične veterinarske inspekcije;
- saradnja s međunarodnim veterinarskim, zdravstvenim i sličnim institucijama i udrugama (O.I.E., WHO, FAO, Evropska komisija i sl.).

## X

Rad Kancelarije se finansira iz Budžeta institucija Bosne i Hercegovine i međunarodnih obaveza Bosne i Hercegovine.

## XI

Ova odluka stupa na snagu danom objavljivanja u "Službenom glasniku BiH", a objavit će se i u službenim glasilima entiteta.

Predsjedavajući Vijeća ministara BiH dr.Spasoje Tuševljak, s.r.